



ZETI (dua dari kiri) semasa pengumuman agihan pembayaran ASB secara maya dari Menara PNB, Kuala Lumpur semalam.

Pengagihan pendapatan, bonus dikredit 1 Januari

10.2j individu terima dividen 4.25 sen seunit

Oleh ZULKIFLI MANZOR

PETALING JAYA – Amanah Saham Nasional Bhd. (ASNB) semalam mengumumkan pembayaran pengagihan sebanyak 4.25 sen untuk dana Amanah Saham Bumiputera (ASB) bagi tahun kewangan berakhir 31 Disember 2020.

Agihan pembayaran dividen merangkumi 3.5 sen seunit dan bonus 0.75 sen seunit berbanding 5.50 sen seunit tahun lalu.

Bagaimanapun, pemegang unit ASB pada tahun ini akan turut menerima bayaran tambahan berbentuk pengagihan ehsan sebanyak 0.75 sen seunit untuk 30,000 unit pertama mereka sempena ulang tahun ASB ke-30.

Pengerusi Kumpulan Permodalan Nasional Bhd. (PNB), Tan Sri Dr. Zeti Aziz berkata, jumlah keseluruhan pembayaran pengagihan bernilai RM7.6 bilion ASB yang diumumkan pada tahun ini akan memanfaatkan seramai 10.2 juta pemegang unit yang memiliki 173.2 bilion unit.

“Pengagihan pendapatan merangkumi pengagihan pendapatan sebanyak 4.25 sen seunit. Tahun ini juga bersempena ulang tahun ASB yang ke-30, PNB berbesar hati mengumumkan pengagihan 0.75 sen bagi 30,000 unit pertama.

“Pengagihan pendapatan ini memberi pulangan efektif lima peratus kepada pemegang unit yang mempunyai 30,000 unit dan ke bawah. Bagaimanapun bagi pemegang unit yang mempunyai lebih 30,000 unit, bonus 0.75 sen itu hanya untuk 30,000 unit pertama.

“Ini adalah tanda penghargaan kami kepada semua pemegang unit ASB yang terus setia bersama kami sepanjang 30 tahun dana ini diperkenalkan,” katanya ketika mengumumkan agihan pembayaran ASB secara maya dari Menara PNB di ibu negara semalam.

Pengumuman itu sekali gus menjadikan jumlah pengagihan pendapatan dan bonus terkumpul dana ASB sejak mula ia

diperkenalkan pada tahun 1990 adalah sebanyak RM159.6 bilion.

Zeti berkata, pengiraan pengagihan pendapatan dan bonus ASB adalah berdasarkan baki purata minimum bulanan yang dimiliki sepanjang tahun kewangan.

“Unit yang dilaburkan semula daripada pengagihan pendapatan dan bonus akan dikreditkan ke dalam akaun pemegang unit pada 1 Januari 2021,” ujarnya.

Dalam pada itu, ASNB mengisytiharkan pembayaran pengagihan pendapatan Amanah Saham Nasional (ASN) bagi tahun kewangan berakhir 31 Disember 2020 sebanyak RM36.6 juta iaitu pulangan sebanyak 2.02 sen seunit.

Pengagihan pendapatan itu memberikan hasil dividen 3.18 peratus berdasarkan jangkaan Nilai Aset Bersih dana pada 31 Disember 2020.

Pembayaran itu akan memberi manfaat kepada 1.21 juta pemegang unit dengan jumlah pelaburan melebihi 1.8 bilion unit.